



Partido dos Socialistas de Galicia
Grupo Provincial Socialista de Ourense

Rúa do Progreso 32, 2º
32003 Ourense
Teléfono: 988 385 203
Fax: 988 385 178

FRANCISCO JOSÉ FRAGA CIVEIRA, deputado e portavoz provincial do **GRUPO SOCIALISTA** da Deputación de Ourense, en base ó previsto na Lei de Bases Reguladora do Réxime Local, ó artigo 91 e 97, entre outros, do R.O.F. e o Regulamento da Corporación presenta unha **MOCIÓN PARA A RETIRADA DA MEDALLA DE OURO DA PROVINCIA Ó DITADOR FRANCISCO FRANCO**, en base á seguinte;

EXPOSICIÓN DE MOTIVOS

Hai exactamente 60 anos, en xullo de 1957, tal como recolle a acta de sesión do pleno ordinario do 26 de xullo, foille imposta e outorgada a primeira medalla de ouro da provincia ó ditador e Xefe de Estado, naquel intre, Xeneral Francisco Franco con motivo da súa visita á provincia para inaugurar a liña ferroviaria Puebla de Sanabria-O Carballiño (integrada na liña Zamora-A Coruña). Naquel momento foi recibido, el mais a súa dona, neste pazo provincial por as máximas autoridades políticas, militares e eclesiásticas de Zamora e Ourense así coma varias do Estado coas maiores honras e pompa, ó estilo da época. Non se nos pode escapar que, naquel intre, debido a imposición dun réxime ditatorial após o golpe de Estado do 36, era obrigatorio para os e as veciños e veciñas de Ourense dirixir as súas loas ó ditador.

No contexto actual e en virtude do cumprimento que se lle debe á Lei 52/2007 de 26 de Decembro, en vixencia pero sen orzamentar, pola que se recoñecen e amplían os dereitos e se establecen medidas a favor de quen padeceron persecución ou violencia durante a guerra civil e a ditadura, máis coñecida, popularmente, coma a Lei da Memoria Histórica; a nosa Deputación debe facer un esforzo unánime para amosar apoio ás iniciativas que servan para dar conta e respostar ás demandas dos cidadáns que, de xeito lexítimo e xusto, reclamaron ó Estado que, no marco da Constitución, se repare e se honre a todos/as os/as que padeceron inxustamente os agravios dun réxime ditatorial e a persecución por parte dos que defenderon ideas totalitarias.

Máxime se temos en conta que esta Deputación provincial é a única de Galicia que aínda non lle retirou as honras ó ditador, co menoscabo que iso supón para todas as vítimas e represaliados/as desta provincia. A existencia dunha demanda social a prol da reparación histórica vese reflectida en feitos tales coma o servizo de identificación, localización e análise de fondos documentais existentes sobre a represión na provincia de Ourense que esta institución ten habilitado en colaboración co Obradoiro de Historia Contemporánea da Universidade de Vigo. A pesar destes antecedentes, atopámonos coa evidencia de que foi a primeira medalla de ouro da provincia concedida e vai ser a última en ser retirada.

Aceptando o feito de que a represión foi especialmente cruenta nos anos da guerra e que se materializou, no noso país, mediante o asasinato de máis de



Partido dos Socialistas de Galicia
Grupo Provincial Socialista de Ourense

Rúa do Progreso 32, 2º
32003 Ourense
Teléfono: 988 385 203
Fax: 988 385 178


5.000 persoas e noutras múltiples formas de violencia física, psicolóxica, laboral, económica, social, etc, non foi menor a imposición violenta da ideoloxía, da moral, da educación e dos valores franquistas que afectou a toda a sociedade durante 40 anos. Por todo isto, dende o Grupo Provincial Socialista, consideramos que os tempos son chegados e apelamos ó espírito de conciliación e consenso así coma á defensa a ultranza da democracia e do Estado de Dereito, por parte desta Corporación. O exercicio da memoria histórica, o coñecemento da verdade, a xustiza, a reparación e rehabilitación das persoas perseguidas polo fascismo, son dereitos humanos fundamentais que temos como sociedade e obrigas que adquirimos coas vítimas e as súas familias. As institucións públicas deben ter un posicionamento claro de condena do golpe de Estado do 36, da ditadura franquista e da brutal represión que sufriron miles de persoas ó longo dese período. Non hai mellor maneira de amosar ese compromiso de xeito público que retirar o meirande recoñecemento que se pode outorgar dende esta institución ó máximo responsable da ditadura fascista.

Polo exposto, o Grupo Provincial Socialista presenta as seguintes **PROPOSTAS DE ACORDO:**

1. Retirar de xeito inmediato, en cumprimento co artigo 15.1 da Lei 52/2007 de 26 de Decembro, a medalla de ouro outorgada ó ditador Francisco Franco en xullo de 1957, así como todas as honras dedicadas á súa persoa.
2. Facer constar a referida retirada na acta da sesión ordinaria así como no Regulamento de honras e distincións desta Deputación.
3. Engadir un encarte na acta do pleno do 26 de xullo de 1957 no que se faga constar esta moción e a consecuente retirada de honras para que dita circunstancia quede claramente explicada ás xeracións vindeiras.

En Ourense, 13 de xullo de 2017

Asdo. O Portavoz



SR. PRESIDENTE DA DEPUTACIÓN PROVINCIAL DE OURENSE